



«GAINTXURIZKETAKO INDUSTRIALDEEN ETA KANPO ALDEKO ERREPIDE BERRIAREN IZENDAKETA»

Jaioberriari beti izena jartzen zaion bezala, horrela da ohitura gure kale eta eskualdeekin. Hortarako badaude zenbait irizbide ezberdin, herriko pertsonaia ospetsu baten izena darabilkitenak esate baterako, edo bestela ekintz historiko baten izena edo data ipintzen dutenak. Baina Euskal Herrian gehien erabili izan dena toponimi erizbidea izan denez, eta hau argi eta garbi azaltzen da gure herri eta bailara izenetan, gure abizenetan, gure mendi, bide, erreka, baserri... izenetan, hauxe da ondorioz gure industrialde jaioberriak eta beraien barruan sortuko diren kaleak bataiatzeko proposatzen duguna.

Hauetako industrialde batzuk aspalditik zeuden arren, ez zeukaten inolako izenik, eta bereizteko edo aipatzeko orduan beren legezko banatze zenbakiak erabiltzen ziren, eta gainera erdaraz, 108 (ciento ocho) poligonoa, 103 (ciento tres) poligonoa... Egoera lotsagarri honek lezoarren alde ezer gutxi esaten zuela ikusiz, gaia Kultur Batzordean ikertu zen eta behin izenak bilatu ondoren Gobernu Batzordera pasa zen beren onarpena egin



«ITTURRIN» INDUSTRIALDEA



« Sagasti » Industrialdea

zezaten. 87ko urriaren 19ko bileran onarturik gelditu zen eta gaur obren bukaeraren zain gaude hauen bataio erreala gauzatu dadin.

Ikus ditzagun zeintzu izan dira aukeratutako izenak, zeintzu beren arrazoiak, eta zein beraien kokapena.

1. — 103. POLIGONOA

Zabalera honetan bazeuden bi izen eztabaidatzeko: Lehenengoa LETAMAN eta bigarrena ITTURRIN (ITTURRIENE). Lehenengoarekin beheko aldean, tunel ondoan dagoen zabalera izendatzen duena, eta bigarrena goiko aldeko zelaiak hartzen zituen baserri zaharraren izena daramana.

Bigarren hau lehenengoa baino zabalagoa denez, baita Letaman bera ere hartzen bait du bere barnean, izan da aukeratu dena industrialde osoari izena emateko orduan. Baita kontuan hartu da bataiatzeko orduan, Itturin desagerturiko baserria dela, eta bertako baserritarrek oraindik izen hau darabilkitela leku honi nolabait deitzeko. Beraz aukeraturiko izena ITTURRIN INDUSTRIALDEA da.

Beheko mapan ikus daitekenez, bere barruan lau kale sortzen dira, eta erizpide toponimiko berak erabiliz, hauxek dira harturiko izenak:

1. ITTURRIN KALEA.—Itturin baserria zegoen lekutik pasatzen dena. Bera izango da industrialde honen ardatza edo bide nagusia.
2. ABENDAÑO KALEA.—Abendaño baserriraino igotzen dena.
3. OLAIZOLA KALEA.—Olaizola baserrirantz zuzentzen dena.
4. ITXU KALEA.—Itxu baserrira igotzen dena.

2. — 103. POLIGONOA

Kontuan hartuz industrialdeko lur gehienak SAGASTI baserria zenaren eremuetan daudela, egokiena zirudien baserri honen izena erabiltzea, eta horregatik hauxe izan zen aukeratua: SAGASTI INDUSTRIALDEA. Bere barruan sortzen diren lau kaleak izendatzeko erizpide berari jarraituz honako izen hauek onartu ziren: URUNE KALEA, Urune baserria zenaren aurretik pasatzen dena, IRURTZUN KALEA oraindik zutik dirauen eta denok ezaguturiko taberna denaren aurretik igarotzen dena, SAGASTI KALEA Sagasti baserria zenaren aldekoa eta HARITZBAKAR. Azken honen izen jartzea izan da prolematikoena ez baita bide hau, izenik daraman inongo leku ezagunetik pasatzen, baina kontuan hartuz bidea luzapen hipotetiko batekin HARITZBAKAR baserriko lurraldeetara iritsiko zela, hauxe izan zen bataiatzeko orduan ontzat eman zen izena. (Ikusi beheko mapa.)

3. — KANPO ALDEKO ERREPIDE (EDO IBILBIDE) BERRIA

Oraindik bukatu gabe dagoen bide honekin erizpide bera erabili zen, eta horrela Kultur Batzordeak eskaturik, gure Ilari zahar jakintsuarekin hitzegitea erabaki zen, eta honela jakin ahal izan genuen garai batean kai aldean ba omen zegoela POLENTZARRENE izeneko baserria. Zenbait liburutan konprobatu ondoren izen hau onartu zen bide berria bataiatzeko. Bidea lehen aipatu dudan bezala bukatzeaz dago, baina proiektuak falta ez direnez gero, laster espero dugu gure POLENTZARRENE BIDEA oso osorik eta egoki egokirik ikustea.

ZABARRE

